

Kodejakta 2017

– ein friluftskonkurranse for alle



Bli premiert for å gå på tur

Kodejakta er eit tilbod til deg som er glad i friluftsliv og som likar spenstige utfordringar. Her kjem ei ny utfordring:

Rundt om i kommunen har me plassert 10 små skilt som alle har ein unik kode. Skilta er å finna i ulike områder, nokre er det relativt enkelt å ta seg fram til, andre er plasserte i litt meir krevjande terreng. Kvar skilt du finn og kvar kode du noterer deg på skjemaet ditt, gir deg ein sjanse til å vinna i friluftskonkurransen vår.

Finn du alle dei ti skilta og kodane, så deltek du altså med ti lodd i trekninga om fine premiar.

Karta viser kor kodane er plasserte. Som du ser på ramma rundt karta har turane ulik farge:

- Enkel løype. Her kan du ta deg fram med både barnevogn og sykkel. Sjekk om du også kan komma fram med rullestol.
- Middels utfordring
- Ein litt meir krevjande tur.

Konkurransereglar

Leit deg fram til kodeskiltet som er plassert på turen din. På kartet er plasseringa til kodeskiltet omtrentleg markert med ✕. Kvar tur har éin kode som du skal notera i skjemaet som du finn bak i brosjyren. Du kan ikkje notera denne koden meir enn ein gong. Maks. ti kodar på skjemaet ditt.

Stiane som er merka av på karta er ikkje heilt nøyaktige, men ved dei fleste turmåla er det oppgått sti, slik at det skal vera greitt å finna fram.

Kvar turkode gir deg éin vinnarsjanse. Går du alle ti turane deltek du altså med ti «lodd» i konkurransen. Merk at du likevel må ha funne minst fem av

kodane for å delta i konkurransen om hovudpremien.

Kodane, saman med namn på staden du fant dei, sender du saman med namnet ditt, adresse og tlf.nr. til eldfinn.austigard@hjemmeland.kommune.no seinast 1. november.

Du kan òg senda utfylt konkurranse-skjema til:

Hjemmeland kommune
Kulturkontoret
Vågavegen 115
4130 Hjemmeland

Premiering vil skje innan 10. november.

Kodejakta er støtta av



Har du lyst å utforska andre turmål? Hjemmeland kommune har mange andre interessante turstiar å velja mellom. Sjå www.hjemmeland.kommune.no (turstiar), www.ut.no (Hjemmeland), [f](#) På tur i Hjemmeland eller [f](#) Kodejakta.

Premiar:



1. premie:
Gavekort på kr
5.000 på
Enkel Bygg og
Butikk
(Gjeld berre MX-Sport)



2. premie:
Trangia 25-4 UL/GB
stormkjøkken



5. premie:
Tursett




4. premie:
Teltlykt



3. premie:
Eagle kaffikjele

KONKURRANSEFRIST: 31. OKTOBER 2017



P Parkering
 Fylkesveg
 Kommunal veg
 Turveg

Ryganfossen

Alternativ 1:

Kjør innover Songesandvegen og ta av til venstre mot garden Åse. Kjør ca. 1,5 km vidare langs denne vegen og parker ved brua som vist på kartet. Herfrå er det bilveg ca. 3 km fram til Ryganfossen.


Vegen er lett og fin å gå, men etter ca. 1,5 km er det ei bratt kneik som kan by på ei utfordring dersom du har barnevogn eller rullestol.

Alternativ 2:

Start frå Nes og følg merka turistløype ca. 400 m parallelt med Storånå, men ta av til høgre straks



etter grinda der turistvegen går inn i «trappene». Følg deretter merka sti langs gjerdet og etter kvart bratt opp mot Åse. Vidare går turen langs bilveg bort til majestetiske Ryganfossen, som har eit fall på heile 56 m.



P Parkering

***** Utkikkspunkt

 Kommunal veg

 Turveg

Tausanibbå

Tausanibbå ligg i eit ope, flott fjellparti. Parkering og utgangspunkt for turen er på Åsland, den høgstliggjande garden på Jøsneset.


Frå parkeringsplassen er det bratt stigning opp til fjellet, men vel oppe finn ein snau og vakker lynghei, med himmelvid utsikt over heile Ryfylke.

Du treng ca. 1 time på turen opp til Tausanibbå, som ligg ca. 500 m.o.h. Stien er merka.

Dersom du heller ynskjer å gå turen som rundløype, kan du følgja merka sti vidare austover frå Tausanibbå,



via Hedlestøl, og følgja skilting ned til Åsland. Denne rundturen tek ca. 2-3 timar.



P Parkering

★ Utkikkspunkt

— Riksveg

— Fylkesveg

— Turveg

Medåsen

Parker på nedsida (vestsida) av vegen før høgresvingen rett etter husa på Staurland. Gå litt tilbake og ta av på skogsvegen opp til høgre.


Følg skogsvegen, som etter ca. 300 meter går langs dyrka mark. Herfrå er det merka sti/veg bratt oppover mot Medåsen, som ligg på 330 m.o.h.

Du bør rekna ca. 1 time til toppen. Undervegs kan du velja å gå til to forskjellige utkikkspunkt: Hammaren, der ein ser mot Hetlandsbygda, og Ognen, der ein får utsyn over Årdalsfjorden.



På toppen av Medåsen vil du finna ein postkasse med besøksbok. Her er òg koden plassert.

Turen tilbake bør du leggja via Bjørkjeskartjødnå og ned Bjørkjeskaret. Heile rundturen tek ca. 2 timar. Stien er merka.



P Parkering

 Kommunal veg

 Turveg

Vormeland

Utgangspunktet for turen til Vormeland startar frå den gamle ferjekaien i Tytlandsvik.


Frå vegskiltet , ca. 100 m frå kaien, går stien bratt oppover lia ca. 1 km mot Vormeland. Stien blei i eldre tider mellom anna brukt som skuleveg. Kodeskiltet finn du ved det gamle kvernhuset ca. 300 m før du kjem opp til Vormeland.

På turen vil du passera eit par fine gamle bygg som tek deg tilbake til ei svunnen tid.



Turen tek ca. 1,5 time tur/retur.

Opptrødd sti, som vanlegvis er tørr og fin å gå.



P Parkering

 Kommunal veg

 Turveg

Grøvtøl


Turen til Grøvtøl startar frå parkeringsplassen ved Bjødnabuvegen, som er merka med «Jørmeland» på eit lite skilt i vegkanten.

Frå parkeringsplassen går turen først nedover mot Sandamyra i småkupert terreng gjennom ein liten skog. Over Sandamyra kan det vera blautt etter regnvêr, men her er det lagt ut langsgåande plankar til å trø på.

Rett etter Sandamyra møter stien driftarvegen, som kjem opp frå Husstøl. Herifrå er stien svært godt opptrødd, og mykje av stien går i tørt terreng med sand, stein og grus.



Vidare mot Grøvtøl kan ein velja om ein vil gå rundturen via Jørmeland (nordleg trasé), der det er ein postkasse med turbok, eller om ein berre vil gå til og frå Grøvtøl på den sørlege traséen som er avmerka på kartet. Rundtur og tur/retur tek ca. 2 timar.



P Parkering

***** Utkikkspunkt

 Kommunal veg

 Turveg

Saupstølheia

Bjødnebu er eit greitt utgangspunkt for turen til Saupstølheia. Merk at du bør parkera på parkeringsplassen i botnen av den siste nedoverbakken, før vegen går vidare opp til høgde mot Bjødnebu ski- og friluftsanlegg.


Frå parkeringsplassen går det traktorveg over ei lita bru og vidare langs beita på Bjødnebu. Ved den siste stølshytta går traktorvegen over til ein sti som tek deg vidare på oppstiging langs Bjødnebufossen.

Fortset ca. 2,5 km på turstien, som har blitt godt opptrødd som driftarveg. Like før du kjem til Svartatjødnå



deler stien seg. Her fortset du austover i retning nordenden av tjørna. Følg deretter stien vidare opp lia til du ser eit skilt som viser retninga mot toppen av Saupstølheia, som ligg på ca. 730 m.o.h.

Du bør rekna ca. 4 timar tur/retur.



P Parkering

Fylkesveg

Turveg


Vigane

Turen til Vigane startar ved avkjørsla frå Vormedalsvegen, der det er skilta nordover til Vigane. Ved avkjørsla er det eitt par små parkeringsplassar, som òg blir brukt av dei som bruker Lendinga, éin av badeplassane ved Breilandsvatnet.



Turen går ca. 1 km på kommunal, asfaltert bilveg inn til kodeskiltet, som du finn på eit berg på venstre side av vegen.

Denne turen er òg godt eigna for rullestolbrukarar og dei som vil gå tur med barnevogn. Heile turen tar ca. 40 minutt tur/retur.



Parkering



Utkikkspunkt



Kommunal veg



Turveg

Tverrgjøvle


Kjør inn mot Nes i Årdal. Ca. 300 m før den store parkeringsplassen på Nes vil du sjå skiltet «Tverrgjøvle» og ein gjerdekyvar på venstre side av vegen. Her er det mogleg å parkera.

Den første delen av turen til Tverrgjøvle startar med ein bratt sti oppover i granskogen, før den svingar austover ein bjørkekledd ås og vidare på snaufjellet inn mot Tverrgjøvle.

Frå toppen får du imponerende utsyn mot alle himmelretningar.

Du bør rekna ca. 4 timar tur/retur. Stien er merka.





P Parkering

***** Utkikkspunkt

 Kommunal veg

 Turveg


Seglet

Utgangspunktet for turen til Seglet startar frå Buhagen på Hauge i Jøsenfjorden. Kjør fylkesvegen inn langs fjorden, ta av til Hauge over Hauge bru ved barnehagen og bedehuset, og følg Haugevegen til du møter skilt med «Buhagen» ved den gamle branngarasjen. Følg skiltet, og parker ved grinda før brua over bekken. Husk å lukke grinda!

Her startar stien først på ein skogsvog. Følg denne ca. 500 m til endes, og deretter sti vidare opp bakken til høgre. For å nå utkikkspunktet på Seglet, held du fram ca. 50 m på sti



langs Iglatjørn. Følg stien ca. 10 minutt opp til høgre på berget, til venstre gjennom skogen, ned eit lite skar og opp på flaten med fantastisk utsikt over Hauge og Jøsenfjorden. Stien er merka, og turen tar ca. 2 timar tur/retur.



P Parkering

***** Utkikkspunkt

— Turveg

Skumahei – Viglesdal

Koden finn du i austenden av Skumaheia (på brotet ned mot Rausdal), og på nordsida av elva i Viglesdalen. Det er nok å noterera berre éin kode.

Turen via Skumaheia startar frå parkeringsplassen på Nes i Årdal. Følg merka tursti mot Viglesdalen. Ved Rygg, ca. 100 m etter at du har passert skiltet «Jettegryte», svinger du til høgre og går bratt opp lia til du treff stien som går inn mot Hedlestøl. Kryss Hedlestøllåna og gå mot den raude hytta på Hedlestølen. Her går stien bratt opp mot Skumaheia. På toppen er det flatt og lett å gå.



På brotet ned mot Rausdal må du velja om du skal gå ned i Rausdal, vidare ned til Storåna og vada over denne til Viglesdalen. Ved mykje nedbør eller snøsmelting, er det tryggast å snu og gå tilbake den same vegen som du gjekk opp. Heile rundturen tek ca. 5-7 timar.

Fjellvettreglane

1. Planlegg turen og meld frå kor du går
2. Tilpass turen etter evne og forhold
3. Ta omsyn til vêr- og skredvarsel
4. Ver førebudd på uvêr og kulde, sjølv på korte turar.
5. Ta med nødvendig utstyr for å kunna hjelpa deg sjølv og andre.
6. Ta trygge vegval. Kjenn igjen skredfarleg terreng og usikker is.
7. Bruk kart og kompass. Alltid vit kor du er.
8. Vend i tide, det er ingen skam å snu.
9. Spar på kreftene og søk ly om nødvendig.

UT.no




Registreringskjema

	Turmål	Besøkt dato	Kode
1	Ryganfossen		
2	Tausanibbå		
3	Medåsen		
4	Vormeland		
5	Grøvtstøl		
6	Saupstølheia		
7	Vigane		
8	Tverrgjøvle		
9	Seglet		
10	Skumahei – Viglesdal		

Namn	Adresse	Telefonnr.

God tur!

Hjelmeland kommune © 2017
Grafisk utforming: Hetland Media



Utsikt mot Ryganfossen
(Foto: Elafinn Austigård)



HJELMELAND
KOMMUNE

inkluderande, løysingsorientert & framtidsretta

